



Wilfred (enam dari kanan) bersama penerima Anugerah Tahun Pengkomersialan Malaysia 2017 pada Sidang Kemuncak GECommunity.

Agensi kerajaan, industri menang RM1j anugerah MCY

Agensi kerajaan dan pemain industri memenangi hadiah keseluruhan RM1 juta yang ditawarkan Kementerian Sains, Teknologi dan Inovasi (MOSTI) menerusi Anugerah Tahun Pengkomersialan Malaysia (MCY).

Anugerah bersempena sorotan utama Sidang Kemuncak GECommunity 2017 (GECommunity) adalah untuk meraikan sumbangan bakat tempatan kepada pertumbuhan ekonomi negara menjelang tahun 2050.

Menteri Sains, Teknologi dan Inovasi, Datuk Seri Panglima Wilfred Madius Tangau, berkata Anugerah MCY bermatlamat memberi pengiktirafan dan insentif kepada produk serta teknologi terbaik yang dihasilkan.

Galak minat dalam pengkomersialan R&D

"Anugerah ini untuk menggalakkan minat dalam pengkomersialan produk penyelidikan dan pembangunan (R&D) negara. Anugerah MCY yang akan dijadikan program tahunan ini menerima 270 penyertaan dan 130 daripadanya berpotensi untuk dikomersialkan," katanya kepada media di luar Sidang Kemuncak GECommunity yang berlangsung di Kuala Lumpur mulai semalam.

Anugerah MCY disampaikan oleh Perdana Menteri, Datuk Seri Najib Razak. Sebanyak enam kategori dipertandingkan di mana Anugerah Pencapaian Pengkomersialan dimenangi ANANOCOAT dari Taman

Teknologi Malaysia yang menerima trofi, sijil dan wang tunai RM130,000.

Bagi Anugerah Usaha sama Penyelidikan dan Perniagaan, ia dimenangi Palm Based Chicken Feed dari Lembaga Minyak Sawit Malaysia (MPOB) yang membawa pulang hadiah juga trofi, sijil dan wang tunai RM130,000.

Anugerah Usahawan Penyelidik pula diraih TACCOMS (Universiti Pertahanan Nasional Malaysia (UPNM) yang memenangi trofi, sijil dan wang tunai RM130,000. Anugerah Usahawan Inovator Baharu milik TIGERUS CORDYSEPS (Bioeconomy Corporation) dan Anugerah Usahawan Sosial menjadi milik TERAPL.MY (Taman Teknologi

Malaysia) yang masing-masing menerima trofi, sijil dan wang tunai RM130,000.

Terbaik keseluruhan

Bagi Anugerah Ulung MCY (anugerah terbaik keseluruhan) ia menjadi milik TACCOMS yang menerima trofi, sijil dan wang tunai RM100,000.

Anugerah MCY juga mengiktiraf lima lagi peserta untuk hadiah sagu hati yang menawarkan hadiah tunai masing-masing RM50,000.

"MCY adalah program perintis yang menjadi platform untuk dimanfaatkan secara bersama oleh pelbagai agensi kerajaan dan industri dalam usaha untuk mengkomersialkan produk hasil daripada R&D, kata Wilfred.